



KENYATAAN MEDIA

KEMENTERIAN EKONOMI
JABATAN PERANGKAAAN MALAYSIA

Blok C6 & C7, Kompleks C,
Pusat Pentadbiran Kerajaan Persekutuan, Presint 1,
62514, Wilayah Persekutuan Putrajaya
No. Telefon : 03 - 8090 4681

STATISTIK SEKTOR INFORMAL DAN PEKERJAAN INFORMAL, MALAYSIA, 2023

Pekerja informal Malaysia pada tahun 2023 mencecah seramai 3.45 juta orang, merangkumi 21.8 peratus daripada jumlah guna tenaga negara

PUTRAJAYA, 28 NOVEMBER 2024 – Pekerja informal Malaysia pada tahun 2023 mencecah seramai 3.45 juta orang, merangkumi 21.8 peratus daripada jumlah guna tenaga negara, lapor Jabatan Perangkaan Malaysia (DOSM) pada hari ini dalam **Laporan Survei Sektor Informal dan Pekerjaan Informal, Malaysia, 2023**. Laporan ini membentangkan jumlah guna tenaga dalam sektor informal dan pekerjaan informal berdasarkan Survei Sektor Informal yang dilaksanakan oleh DOSM.

Menurut Ketua Perangkawan Malaysia, Dato' Sri Dr. Mohd Uzir Mahidin, "Susulan prestasi ekonomi Malaysia yang berdaya tahan pada 2023, ianya telah mendorong kepada kedudukan pasaran buruh yang kekal stabil, didorong oleh permintaan domestik yang kukuh, peningkatan aktiviti pelancongan, pemulihan projek infrastruktur, pelaburan langsung asing yang berterusan, dan potensi peningkatan perdagangan luar. Pemulihan pertumbuhan ekonomi Malaysia ini telah membuka pelbagai prospek dan meningkatkan penyertaan dalam pasaran buruh. Justeru, situasi ini turut menyumbang kepada peningkatan dalam bilangan guna tenaga dalam sektor informal dan pekerjaan informal di Malaysia pada tahun 2023 berbanding tahun 2021."

Liputan guna tenaga dalam sektor informal merujuk kepada ahli isi rumah berumur 15 hingga 64 tahun yang bekerja sekurang-kurangnya sejam dalam minggu rujukan sebagai majikan, pekerja, bekerja sendiri dan pekerja keluarga tanpa gaji. Antara kriteria utama sektor informal merangkumi saiz pekerja kurang daripada sepuluh orang dan tidak berdaftar di bawah perundangan yang ditetapkan. Laporan ini menyediakan statistik mengikut ciri-ciri demografi dan sosioekonomi iaitu kumpulan umur, jantina, strata, negeri, pencapaian pendidikan, taraf pekerjaan, kategori pekerjaan dan industri. Berdasarkan panduan *Measuring Informality: A Statistical*

Manual on the Informal Sector and Informal Employment oleh International Labour Organization (ILO), aktiviti berkaitan pertanian dikecualikan dalam liputan Survei Sektor Informal. Walau bagaimanapun, sejak 2021, Survei Sektor Informal Malaysia telah meliputi data guna tenaga informal termasuk sektor Pertanian bagi memberikan gambaran yang lebih komprehensif.

Sementara itu, pekerja dalam pekerjaan informal merujuk kepada mana-mana pekerja yang tidak mempunyai akses kepada sekurang-kurangnya satu skim keselamatan sosial atau faedah pekerjaan. Skim keselamatan sosial dan faedah pekerjaan merujuk kepada: dana pencen; insurans kesihatan asas; insurans kecederaan; faedah hilang upaya; faedah kepada yang terselamat; cuti tahunan bergaji; cuti sakit bergaji; cuti bersalin berbayar; dan insurans pengangguran. Berdasarkan garis panduan *International Conference of Labour Statisticians* (ICLS), pekerjaan informal ditakrifkan sebagai penjumlahan bilangan pekerjaan informal, sama ada dijalankan dalam perusahaan sektor formal, perusahaan sektor informal atau isi rumah.

Selanjutnya, Dato' Sri Dr. Mohd Uzir Mahidin menyatakan bahawa pada tahun 2023, jumlah pekerjaan informal termasuk pertanian adalah berjumlah 3.45 juta orang, dengan peratus sumbangan sebanyak 53.2 peratus (1.83 juta orang) dalam sektor informal, diikuti oleh sektor formal iaitu pada 46.1 peratus (1.59 juta orang) dan isi rumah dengan 0.7 peratus (24.2 ribu orang). Sementara itu, bilangan pekerjaan informal bagi bukan pertanian yang merangkumi sektor formal dan informal serta isi rumah adalah sebanyak 2.84 juta orang. Pada tahun tersebut, pekerjaan informal tertumpu dalam sektor formal (51.9%) dengan 1.48 juta orang dan diikuti oleh sektor informal (47.2%) dengan 1.34 juta orang.

Selain itu, melihat dari segi taburan pekerjaan informal mengikut jantina termasuk pertanian, lelaki merangkumi komposisi terbesar dengan 61.0 peratus mencatatkan 2.10 juta orang, diikuti oleh perempuan dengan 39.0 peratus merekodkan 1.35 juta orang pada tahun 2023. Bagi sektor bukan pertanian pula, lelaki kekal mendominasi dengan 55.7 peratus dengan seramai 1.58 juta orang, diikuti oleh perempuan dengan 44.3 peratus merekodkan 1.26 juta orang. Sementara itu, pekerja informal di kawasan bandar meliputi peratus sumbangan terbesar iaitu sebanyak 74.9 peratus (2.58 juta orang) berbanding kawasan luar bandar (25.1%; 0.87 juta orang). Manakala, bagi sektor bukan pertanian, kawasan bandar merangkumi 83.2 peratus pekerja informal atau bersamaan dengan 2.37 juta orang manakala kawasan luar bandar dengan 16.8 peratus atau bersamaan 0.48 juta orang.

Dato' Sri Dr. Mohd Uzir Mahidin turut menyatakan bahawa guna tenaga dalam sektor informal bagi sektor bukan pertanian mencatatkan peningkatan iaitu sebanyak 4.2 peratus kepada 1.34 juta orang pada 2023 berbanding tahun 2021^r (-0.8%; 1.24 juta orang) dan 2019 (-4.8%; 1.26 juta orang). Pada masa yang sama, kedua-dua pekerja lelaki dan perempuan dalam sektor informal masing-masing naik sebanyak 0.5 peratus kepada 720.4 ribu orang (2021^r: 713.9 ribu orang) dan 9.1 peratus kepada 622.1 ribu orang (2021^r: 522.9 ribu orang), berbanding tahun

2021. Sementara itu, lelaki merupakan penyumbang terbesar kepada guna tenaga dalam sektor informal termasuk pertanian dengan 62.5 peratus atau bersamaan dengan 1.15 juta orang dan perempuan merangkumi 37.5 peratus (687.3 ribu orang) pada tahun 2023.

Seterusnya, Ketua Perangkawan berkata, "Lebih 70.0 peratus daripada guna tenaga dalam sektor informal adalah dalam kategori bekerja sendiri dengan 1.34 juta orang, bertambah sebanyak 2.2 peratus daripada 1.28 juta orang yang direkodkan pada tahun 2021^r. Seterusnya, kategori pekerja menyumbang sebanyak 17.5 peratus (321.3 ribu orang), dengan sedikit peningkatan sebanyak 0.6 peratus (2021^r: 317.5 ribu orang). Pekerja dalam sektor ini terdiri daripada mereka yang bekerja sebagai pembina rumah, pengasuh, penjaja makanan, pembuat roti, pemotong rumput, buruh, pekerja pembinaan (bangunan), jurujual gerai tepi jalan, tukang jahit, jurujual pasar dan penghantar makanan dan minuman/barangan (penunggang p-hailing) dan pemandu e-hailing. Penjaja (makanan & minuman), *telemarketer* dan buruh ladang tanaman merupakan guna tenaga dalam sektor informal tertinggi pada tahun 2023."

Mengulas lanjut mengenai guna tenaga dalam sektor informal, Dato' Sri Dr. Mohd Uzir Mahidin menyatakan bahawa kebanyakan guna tenaga dalam sektor informal tertumpu dalam sektor Perkhidmatan (50.3%). Seterusnya diikuti oleh sektor Pertanian dengan 30.9 peratus dan sektor Pembuatan (12.2%). Manakala, aktiviti Perdagangan borong dan runcit; pembaikan kenderaan bermotor dan motosikal merangkumi 19.6 peratus daripada sektor Perkhidmatan, ini diikuti oleh aktiviti Perkhidmatan makanan dan minuman (16.0%).

Sementara itu, sebahagian besar guna tenaga dalam sektor informal beroperasi di tempat kediaman (29.1%), diikuti di ladang, kebun, estet, bendang, laut dll. (berkaitan pertanian) dengan 26.8 peratus dan kilang/pejabat/bengkel/kedai/kiosk (berasingan daripada tempat kediaman) dengan 16.5 peratus. Melihat kepada guna tenaga mengikut strata, kawasan bandar mencatatkan peningkatan guna tenaga dalam sektor informal, manakala kawasan luar bandar merekodkan penurunan guna tenaga dalam sektor informal pada tahun 2023. Kawasan bandar mencatatkan kenaikan sebanyak 5.8 peratus kepada 1.27 juta orang (2021^r: 1.13 juta orang). Sebaliknya, guna tenaga dalam sektor informal di kawasan luar bandar berkurang sebanyak 10.0 peratus kepada 569.1 ribu orang (2021^r: 703.0 ribu orang).


Dari segi sijil pendidikan tertinggi, majoriti guna tenaga dalam sektor informal adalah merupakan mereka yang mempunyai sijil SPM dan ke bawah, yang merangkumi 74.7 peratus atau 1.37 juta orang pada tahun 2023. Kumpulan ini merekodkan penurunan sebanyak 0.7 peratus berbanding 1.39 orang pada tahun 2021^r. Tiada sijil/tidak berkenaan berada di kedudukan kedua dengan 10.0 peratus dan Diploma (6.0%).

Mengakhiri kenyataan tersebut, Dato' Sri Dr Mohd Uzir Mahidin menekankan bahawa normalisasi aktiviti ekonomi pada 2023 memberi impak positif terhadap pasaran buruh Malaysia. Permintaan domestik yang stabil, peningkatan aktiviti pelancongan, pembangunan infrastruktur, aliran masuk FDI dan pemulihan perdagangan luar menyokong pertumbuhan guna tenaga. Faktor ini juga menggalakkan peralihan daripada pekerjaan informal kepada pekerjaan formal, seterusnya mencerminkan persekitaran pasaran buruh yang lebih baik.


Jabatan Perangkaan Malaysia (DOSM) telah melancarkan OpenDOSM NextGen sebagai medium yang menyediakan katalog data dan visualisasi bagi memudahkan pengguna menganalisis pelbagai data dan boleh diakses melalui portal <https://open.dosm.gov.my>.

Kerajaan Malaysia telah mengisytiharkan Hari Statistik Negara (MyStats Day) pada 20 Oktober setiap tahun. Tema sambutan MyStats Day adalah “Statistik Nadi Kehidupan”. DOSM menyambut ulang tahun ke-75 Jubli Intan pada tahun 2024.

Carta 1: Pekerjaan informal, Malaysia, 2017-2023



Carta 2: Guna tenaga dalam sektor informal, Malaysia, 2017-2023



Dikeluarkan oleh:

PEJABAT KETUA PERANGKAWAN MALAYSIA

JABATAN PERANGKAAN MALAYSIA

28 NOVEMBER 2024